





















LES
SEAVX
RENVERSEZ.

M. DC. XXIII.

Case

F

38

1326

1624 ag. 231

THE NEWBERRY
LIBRARY



LES

SEAVX

RENVERSEZ.



On comperé, ie des-
 rouillois vn vieux
 mousquet paralyti-
 que & estropié de la
 moitié de ses membres, quand
 ton beau frere Thiebaud me ren-
 dit ton paquet, si proprement
 plié en carré, que ie l'eusse pris
 pour vn Angelot, s'il en eust eu
 aussi bien la couleur que la for-
 me. Ie n'eusse iamais creu qu'il
 eust esté faict en vn village, si ie

A ij

n'eusse trouué en vne des encoi-
gneures vn peu de foing que tu
y auois mis pour remplir le vui-
de & le mieux vnir. Je l'ouuris;
il y auoit deux lettres dedans,
l'vne que tu m'escriuois, l'autre
que tu adressois à Messieurs les
****, laquelle tu me pryois
de rendre scurement en main
propre. Mot qui m'a sans men-
tir bien donné de la peine, & ra-
buté l'entendement: Car ie con-
fesseray librement mon igno-
rance, ie demeuray sept demy
heures, vn quart, deux minuttes
& vne once pour pincer l'intel-
ligence de ceste parole. Je n'y
pouuois mordre; iusqu'à ce que
ayant demandé à boire; & la ser-
uante me donnant vn verre, l'ho-
tesse qui prit garde qu'elle auoit

encore les mains toutes grasses de la vaisselle qu'elle venoit de lauer, luy dict. Fy, que tu es mal propre de presenter comme cela ce verre a cest honneste Soldat, avec tes mains ordes & vilaines. Laisse cela & va t'en les lauer tout à cest heure : i'entendis par là ce que tu voulois dire. C'est pourquoy ie ne manquay pas de me trouuer le lendemain sur les onze heures dans la salle en laquelle Messieurs les * * * * * deuoient disner : Car i'ay assez bonne mine quand ie veux, ouy, & puis ie suis cogneu d'un Suisse de la maison, d'un Sommelier, & du plus ancien Palefrenier. Là i'atendis la reste nuë qu'ils eussent lauë les mains pour se mettre à table, & lors m'appro-

chant de ces Seigneurs, apres leur
 auoir faiët vne reuerence sur le
 modele des enfans Bleus deman-
 dans par l'Eglise, ie luy presentay
 ta lettre, avec tes humbles recô-
 mandations à ses bonnes graces,
 & luy renouelay suyuant ce que
 tu me mandois, la memoire des
 abricots que tu luy presentas il y
 a quelques annees, vne fois que
 ayant esté surpris en pourpoint
 d'une guillee d'eau en chassant,
 il se vint garrer soubs le portail
 de ta vieille grange. Le bon Sei-
 gneur se mit à rire & medit qu'il
 s'en souuenoit fort bien : que tu
 auois ton bon hocqueton avec
 des giestres de toille neufue &
 vne grosse gaine à la ceinture gar-
 nie de deux cousteaux de Cha-
 stellerant. Que tu portois vne

grande, espaisse, & blanche barbe, avec des cheveux longs mi-partis en greue (ie n'entends pas pourquoy il parla plustost sur ce subiect de la Greue que de la place maubert) à la mode des vieux Gaulois : Que tu estois bel homme, grand, droict, & portant la teste aussi haute qu'un nouueau venu à Paris qui cherche chambre garnie. Il adiousta que tu estois de fort bonne compagnie & facetieux : Sur quoy il rapporta que t'ayant enquis ie ne sçay sur quel propos en gaussant, si les abricots n'auoient point quelque vertu particuliere, tu luy respondis plaisamment, que la chair estoit souueraine au mal de dents apposee sur la partie affectee, (ie pense que c'est quelque mot nou-

ueau de la Cour) dans la bouche,
 s'y mettant par apres la teste) dans
 vn four on l'y pouuoit tenir sans
 tousser, iusqu'à ce que le ius fon-
 du par la chaleur humectast les
 genciues: quāt aux noyaux, qu'ils
 estoient fort salutaires aux gout-
 teux, si se couchants sur vn mon-
 ceau d'iceux, ils remuoient les
 pieds & les mains, iusqu'à ce
 qu'ils fussent tous cassez. & re-
 duits en poudre; dequoy tout le
 monde se mit à rire. Au demeu-
 rant, dict il, homme d'aussi bon
 sens quei'en aye encore veu. Je
 le iettay en diuers discours à des-
 fein durāt trois heures qu'il m'en-
 tretint il me respondit tousiours
 si pertinemment que ie doutay
 si ce ne seroit point quelque bon
 vieillard de ville trauesti pour
 quel-

quelque dessein en villageois
 Car il n'en auoit pour tout rien
 que l'habit: & ay tousiours creu
 que ce liure qui fut imprimé il y
 a dix ou douze ans sous le nom
 du Paysan François, ne venoit
 point d'autre main: ce qui mon-
 stre qu'il n'a pas esté tousiours
 nourry entre la vache & la char-
 ruë; car c'est vn discours remply
 de bons excellents & salutaires
 aduis pour la reformation des a-
 bus & desordres de l'Estat, &
 possible que c'est sur ce subject
 qu'il m'escrit, voyons que c'est.
 Là dessus il commada à vn de ses
 Secretaires d'ouurir ta lettre &
 de la lire tout haut. Ce qu'il fit,
 avec tel plaisir & contentement
 de toute l'assistâce, qu'il y en eust
 deux qui s'oublierent à boire, &

vn autre qui au lieu de porter vne aille de pigeon a la bouche, la porta a l'oreille; tant il estoit attentif: Tout le monde estoit estonné d'ouyr vne si douce & si nayfue eloquence. Apres qu'elle eust esté audiencee, monsieur le M. dict qu'il doutoit si tu estois descédu de ce frere Thiebaud là, parce qu'il pensoit auoir autresfois ouy dire a feu monsieur le Feure son Precepteur, qu'il auoit esté tué avec tous ses enfans par ledit sieur. Toutesfois qu'il s'en rapportoit. De ce discours, on entra dans vn autre, qui fut des miseres & conbustions déplorables de ce temps-là, durant les quatre anneés que ce bon & noble Roy Iean, dont ta lettre faict mention a l'entrée, pris par son

oppiniastrise a la journee de Poictiers, demeura prisonnier en Angleterre. Je loüe Dieu, de ce que si ie n'ay pas si bon esprit, cōme plusieurs autres, pour le moins i'ay fort bonne memoire. Car ie rapporterois quasi de mot a mot si ie voulois, tout ce qui fut dit là dessus. Par ma foy, il fait bon ouir ces Messieurs, ils sçauēt de belles & bonnes choses, il ne tient qu'a eux qu'ils ne les facent. Aga, ce Monsieur le M. te parloit des choses passees, il y a ie ne sçay combien d'ans, cōme s'il les eust leuës danston gros liure. Peut estre aussi est-ce luy qui l'acomposé : car ils disent qu'il entend aussi bien le Latin que Conseiller ou Aduocat de la Cour. Ce qui

m'agrea le plus, fut ce qu'il dit de ce Charles Roy de Gauarre, gendre du Roy Iean, contre les troupes duquel le grand pere de ton ayeul comme tu dis, ou ton trisayeul, comme ils disent qu'ils faut dire, s'esleua pour leur faire rendre la plume des poules qu'ils luy auoient mangees. Il l'appella mauuais garçon, broüillon, factieux, ennemy du repos public, & le blasma grandement, de ce que durant la captiuité du Roy son beau pere, & la ieunesse du sieur de M. il auoit par vn leurre vain de réformation, & de libération, soubseuë le peuple amateur de nouueauté, & pour empescher en eau trouble, remply l'Estat de confusion : dequoy il disoit qu'il fut à la fin puny, par vne

issuë lamentable : car il fut brulé
 a petit feu dans vn linceul. Cho-
 se estrange , Iacques, si elle est
 vraye : car il me semble qu'il n'a-
 uoit qu'à pisser dedans pour l'e-
 steindre. En fin toutes les paro-
 les qu'il dit là dessus, furent prises
 par beaucoup de gens pour au-
 tant d'ostages, de paix. En effect,
 c'est dit on, vn fort bon Prince,
 il y a apparence qu'il ne voudra
 point troubler le repos du Roy-
 aume, & qu'il reiettera sagement
 les conseils turbulents de ceux
 qui se figuroiét de faire son mes-
 contentement vn passe par tout
 aux illages pour les banqueter.
 Il ne faignit pas de le dire , tout
 haut protestant qu'il n'en vien-
 droit iamais aux armes si on ne
 l'y cōtraignoit. Dequoy vn Gas-

con qui estoit derriere, vers la
 cheminée, conceut vn tel despit,
 que trāsporté de colere, il en fra-
 pa du pied vn grand coup contre
 le plancher. On luy demanda ce
 que c'estoit: il respondit que c'e-
 stoit vne grosse aragnée presté
 d'accoucher: & que la crainte
 qu'il auoit que quelqu'vn de ces
 meschantes bestioles, ennemies
 des armes, ne vint tendre ses toi-
 les sur sa cuirasse, faisoit qu'il en
 tuoit autant qu'il en trouuoit, a-
 yant de tout temps hay cet ani-
 mal, à cause qu'il ne se prend qu'à
 plus foible que soy, & encore en
 trayson, & par supercherie. Mais
 quelque temps apres estant sorty
 en la basse court, il commença
 d'euaporer sa fougue en plaintes
 & menaces. Ie le rencontray, &

à qui en voulez-vous, luy dis-je,
mon Capitaine? Ah! dit-il, à ce
croquant de ton pays, qui a en-
uoyé ceste lettre, que mal de ter-
re le vire. Nous auions la guetres
sans luy, forcier qu'il est: Car ie
veux perdre la teste & les deux
balaffres que j'ay au front, en sei-
gnes de ma valeur, s'il n'a charmé
tous ces Seigneurs de son babil.
Capitaine de S. Arnaud, quelle
vilanie, qu'un pied plat comme
cela soit plustost creu que deux
mille soldats tous prests au pre-
mier commandement de leur
chef, d'aller prendre la Bastille, si
on les laisse faire. Ne voit-on pas
qu'il ne parle que pour son inte-
rest, de peur de perdre quelque
poule ou quelque brebis roi-
gneuse? Par la mort de tous mes

ennemis , qui pend au bout de mon espee, ie petille, i'enrage, ie creue, ie chie a mes chausses, de despit. mais Diou me damne, le Payfan le Pagara. A peine auoit il acheué ces mots, qu'il alla engager ses armes a vn maquignon pour loüage d'un cheual, resolu tout a fait de r'aller le bon homme, & de faire vn tambour de sapau, pour effrayer to⁹ les autres qui oseroient donner vn conseil de paix. Ie le suiuis, & voyât que ie ne le pouuois destourner de ceste opiniastre resolution par raisons ny remonstrances, i eus recours aux ruses. Le sieur Mondor & Tabarin, dont ie t'ay autres-fois parlé, est icy depuis ces festes, deguisé en vieillard avec vne longue perruque & barbe
blanche,

blanche, & vn habit quasi sem-
 blable au tien, afin de mieux de-
 couvrir sans estre cogneu, vn de
 ses compagnons, qui luy ayant
 emporté son saye & ses grosses
 lunettes, s'est venu ietter icy dās
 quelques troupes. Nous auions
 eu querelle ensemble le soir pre-
 cedent apres soupper, sur le sub-
 iect du cheual Bayard: car m'ayāt
 demandé à combien de poings ie
 croyois qu'il se ferrast, ie luy re-
 spondist à treize. Il soustenoit
 qu'il ne se ferroit qu'à quatre,
 non plus que les autres. La dessus
 nous gageasmes cinquante sols
 & demy, nous en rapportasmes
 au voisin mareschal, qui me con-
 damna brauement, disant que
 quand on ferroit vn cheual quel
 qu'il fust, il ne falloit que deux.

poings pour luy tenir le pied, & autres deux pour enfoncer le clou dans la corne avec le marteau. Le regret de ma perte me fit debagouler contre luy quelques iniures, qui accueillies d'un demétir eussent esclatté en coups si le Marechal se mettant entre deux n'eust faict le hola. Cela se passa pour lors de la façon. Mais pour me vanger de luy par les mains d'autrui, ie m'aduisay de ceste fourbe. Ie fais accroire au Gascon ques'il me vouloit donner cinquante sols & demy, (qui estoit la somme que j'auoy perduë) ie luy mettrois dans vn quart d'heure le Payfan qu'il cherchoit entre les mains, sans qu'il s'allast escorcher les fesses sur vne meschan te selle qui n'a-

uoit que les os & la peau. Il acceptel'offre, ie touche l'argent. Ieluy fais voir de cent pas mon homme qui s'en venoit en tapinois le long de la ruë. Il se iette dessus : iamais courtaut ne fut mieux estrillé. Il fut dobé à poids de marc. Et tu conseilles la paix vilain, & tu dissuades la guerre, maroufle, ha, ha, de par le diable, picque tes bœufs, & ne te mesle d'autre chose. Autant de mots, autant de gourmandes dans les dents, dans les yeux, au menton, au nez, par tout: Il ne falloit pas qu'il demandast comme au partage du gasteau des Roys, pour qui, il eust esté ladre verd s'il ne l'eust senty. Ie te laisse à penser si i'estois bien ayse de voir cela, & de diuertir le furie de ce diable

baptizé, de ta teste, sur celle de mon ennemy. Cela faict, ie me desrobay gentiment, & m'en retournay là ou i'auois laissé nos Princes qui parloient encore de toy, & se mocquoient vn peu de ta mesure de bled. Ils me dirent par apres qu'ils te feroient responce vn de ces iours, & me commanderent de t'escire, cependant qu'ils auoyent pris ta remonstrance en bonne part, & qu'ils t'en aymoient tellement, que si iamais l'occasion s'en presentoit, ils te feroient du bien: Ils en ont le moyen, lacques, & en font tous les iours à gens qui ne leur donnent pas de si bons conseils que toy; ils le recognoistront, ie m'en assure. Apres cela ils se mirent a iouer au mal-cô-

rent. Et moy , apres leur auoir
 fait vne reuerence congruë du
 genoüil & de la teste , ie me reti-
 ray pour t'escrire cecy, & t'en di-
 re mon opinion , qui est que ces
 Princes ne viendront iamais à la
 guerre qu'a l'extremité: ils sont
 tous François , & aiment trop
 leur honneur & le repos public,
 pour entreprendre rien dans l'E-
 stat contre le bien & le seruice du
 Roy. Voila le iugement que i'en
 fais: Toutesfois ie ne veux res-
 spondre de rien: car qui respond
 paye le plus souuent. le sçay qu'il
 a mal pris à mon pere pour auoir
 cautionné côme tu sçais, l'oncle
 de sa tante Annette. Cela le mit si
 bas qu'il fut vne fois reduict à
 boire de l'eau , la chose du mon-
 de qu'il à tousiours le plus haye,

iufqu'à la mort. De laquelle fe voyant proche, ils'en fit apporter vn plein verre, & comme on luy eult demâdé qu'elle humeur le prenoit, veu le mal qu'il auoit voulu toute fa vie à ceste liqueur il respondit, cest la raifon pour laquelle i'en veux boire à ceste heure: car il fe faut reconcilier auant mourir avec les ennemis. Je fuis fon fils de ce costé là: ie n'ayme point d'autre eau que celle qu'on donne à lauer les mains pour se mettre à table. Mais tout cela est vn peu hors de propos. Je reuiens à la derniere partie de ta lettre, en laquelle tu m'exhortes de quitter ce courage guerrier & de retourner à Paris. Mon bon compere, ie pense que c'est mon meilleur, & que

ie ne tarderay guiere à le faire.
 Car par ma foy, comme tu dis
 fort bien, il y fai&t plus beau que
 icy. O place Maubert! ô Pont
 neuf! ô place aux Veaux! ô port
 au charbon! ô port au foin, qu'il
 m'ennuie que ie ne vous reuoye.
 Mais sur tout ce bon petit caba-
 ret nouveau, vers l'Eschelle du
 Téple, où i'auois si bien gaigné
 tes bonnes graces, grosse Nico-
 le, par le moyen de trois sols que
 ie t'auois donnez en neuf fois,
 que i'auois tousiours du frais &
 du meilleur. En bonne foy il y a
 plus de plaisir là qu'à courre la
 vache par les champs avec vne
 harquebuse sur l'espaule. On ny
 a pas la moitié du tēps son saoul
 de pain & d'eau. Ah! que le
 Diable m'emporte si i'y vay.

Que Flambon demeure icy s'il
 veut : quant à moy ie m'en re-
 tourne: ce fut luy qui m'y traina :
 Il estoit caualé par trois ou qua-
 tre Sergens du Chastelet , & ne
 sçauoit plus sur quel pied dâser,
 Cela luy fit prendre resolution
 de se venir ietter en ses quartiers,
 & parce qu'il se falchoit d'y ve-
 nir seul, il me vint embaboüiner
 de belles paroles pour m'induire
 à luy faire compagnie, me repre-
 sentant que ie deurois mourir de
 honte , de demeurer en vne vil-
 le, ou i'auois receul'affront que
 chacun sçauoit , d'estre dégra-
 dé de la place , en laquelle on
 m'auoit constitué prisonnier au
 Fort l'Euesque. Que si i'auois
 tant soit peu d'honneur ou de
 courage, ie m'en deuois ressen-
 tir.

ressentir. Que cestoit à c'est heu-
 re que l'occasion s'en presentoit
 par le moyen de ceste guerre, du-
 rant laquelle si Paris venoit à e-
 stre pris, ie pourrois par l'intel-
 ligence que i'y ay avec les Cro-
 cheteurs mes compagnons, me
 saisir du Pont Neuf, & le garder
 iusqu'à ce que pour reparation
 du tort qu'on m'auoit faict, les
 Escheuins de Paris s'offrissent de
 me venir remettre eux mesmes
 en ma place avec ceremonie, &
 de me donner peage sur tous les
 Maquereaux, Gredins, Coupeurs
 de bourses, Cocus, & gens de
 semblable estoffe, qui y passe-
 roient. Ce qu'il n'estimoit pas si
 peu que pourueu qu'il ny eust
 point de fraude, & que ie prisse
seulement vn sols pour teste, où

pour corne, ie n'eusse moyen d'acheter dans huit iours vn office de Sergent à verge , ou de Crieur iuré , comme estoit mon frere , en preinieres nopces. Il m'en vouloit mesme faire party, il me prit comme il falloit : car i'auois eu le soir auparauant querelle contre nostre femme, à cause de quelques cotterets que ie voulois chastrer , elle ne le vouloit pas; disant qu'une de ses voisines l'auoit assureé , qu'autant que i'en chastrois en Carefme, autant en donnois-ie au diable, pour me chauffer les pieds, & à elle, si elle le permettoit, en Purgatoire. Elle s'opiniastra, iela battis. Cela fit que i'ouuris plus volotiers l'oreille aux inductions de ce charlatan. le m'en repens

à cest heure, car ie ne veux point
 m'ager de guerre, où si i'en veux
 ce sera par ma foy, pour seruir le
 Roy. Pourquoi? c'est nostre
 maistre, nous luy deuons cela. Il
 est si gentil, si potelé, si esueillé:
 & puis on dict qu'il sçait fort bié
 remarquer ce qu'on luy faict.
 S'il venoit à sçauoir que i'eusse
 porté les armes contre luy, il me
 feroit faire la premiere fois qu'il
 me rencontreroit, vne querelle
 d'Allemand par quelque Suisse,
 qui me donneroit de la hante de
 sa halebarde sur les cheueux en
 passant, sans qu'il en fust iamais
 autre chose. Car i'aurois beau
 en informer, au diable le Com-
 missaire ny le Sergent qui vou-
 droit iamais se leuer du liét pour
 luy aller mettre la main au col-

let. Il faudroit que ie beusse cela
doux comme lait. Ah ! que ie
n'y vay pas , mon espée est trop
courte. Il y a vne autre chose,
c'est que i'ayme desmesurément
ce braue Prince, ie ne sçay ce qu'il
m'a fait. Je ne sçauois iamais, é-
stant à Paris , qu'il deust passer
en quelque endroict, que ie ne
laissasse & cotterets & verres
pour y accourir & crier , Viue le
Roy. La derniere fois que ie le
vis, ce fut sur le Pont neuf, à son
retour de Fontaine bleau , sur
l'entrée de l'esté passé. Il estoit
vestu d'un long casaquin d'Es-
carlatte , couuert de passement
d'or, (car il a eu permission du
Pape, verifiée en toutes les bar-
rieres des Sergens de Paris) & vn
petit chapeau retroussé , il ne

me souuient plus de qu'elle couleur. Deuant & apres luy, marchoient ces Seigneurs qui sont icy, il les faisoit si bon voir que rien plus. Je leur conseillerois, si i'estois de leur conseil, des'en tenir tousiours, comme ils estoient lors, le plus pres qu'ils pourroiet. C'est leur honneur & leur profit. Les fols aux eschets, & les sages à la Cour sont tousiours les plus proches du Roy.

I'ay appris cela d'un bon compagnon, qui me bailla vne fois vne lanterne de papier rimé à porter à vn grand homme vieux, qui a la barbe toute blâche, qui sçait plus de secrets qu'Alexis Piemontois, ou le fin Agripa, duquel i'ay leu vne fois le liure, pour faire reuenir le poil du menton, qu'une

fièvre chaude m'auoit fait tomber, i'auois encore quelque chose à t'escrire, mais il ne m'en souuient plus : ce sera pour vne autrefois, quand ie seray à Paris, où i'espere de m'acheminer demain: ce soir icy i'iray là où sont ces seigneurs, crier le Roy boit, avec eux, & si ie puis remarquer ou cest qu'ils mettent leur mescontentement, ie les desfroberay, & puis haut le pied, ie le feray mon benay Batisme sacra, & s'il y a chien qui m'aboye, ie luy iettray mes deux Sceaux apres luy, & luy bailleray de ma courge sur les oreilles, si ie le manque ie luy foureray ma coutelasse quatre aulnes entre chair & cuir, i'ay de bós amis en Cour, Dieu mercy, qui me feront auoir mon abolition

de tout. En tout cas , la Fierce de
Roüen ne me peut manquer: car
ie cognois deux hōnestes hom-
mes qui ont enuie d'estre Cha-
noines de la grand' Eglise , les-
quels en recognoissance de ce
que ie leur ay porté deux fois à
boire plein mes deux Sceaux , &
que ie leur ay faict bonne mesu-
re , en cela ils ont recogneu ma
fidelité , c'est pourquoy ie sçay
bien qu'ils feront ce que ie vou-
dray pour moy. Bon homme ie
me recōmande à tes bonnes gra-
ces , à celles de tes fils & filles ma-
riée. Boy matin , & portetoy bié,
& tu viuras long temps , ie suis
ton tres-affectiōnné seruiteur , à
vendre & a engager.

















